

欽
定
全
唐
文

欽定全唐文卷三百二十七目錄

王維

四

大薦福寺大德道光禪師塔銘

六祖能禪師碑銘

大唐大安國寺故大德淨覺師塔銘

大唐吳興郡別駕前荊州大都督府長史山南東
道採訪使京兆尹韓公墓誌銘

故任城縣尉裴府君墓誌銘

工部楊尚書夫人贈太原郡夫人京兆王氏墓誌

銘

唐故潞州刺史王府君夫人榮國夫人墓誌銘

汧陽郡太守王公夫人安喜縣君成氏墓誌銘

爲崔常侍祭牙門姜將軍文

爲羽林軍祭武大將軍文

爲人祭李舍人文

爲兵部祭庫部王郎中文

爲人祭某官文

爲人祭兵部房郎中文

爲楊郎中祭李員外文

爲王常侍祭沙陀鄴國夫人文

欽定全唐文卷三百二十七

王維_四

大薦福寺大德道光禪師塔銘

禪師諱道光本姓李緜州巴西人其先有特有流若實有
蜀蓋子孫爲民大父懷節隱峨嵋山行無轍迹其季父榮
爲道士有文知名禪師幼孤在諸兒其神獨不偶家頗苦
乏絕元詣鄉校見周孔書曰世教耳誓苦行求佛道入山
林割肉施鳥獸鍊指燒臂入般舟道場百日晝夜經行遇
五臺寶鑑禪師曰吾周行天下未有如爾可教遂密授頓

教得解脫知見舍空不域卽動無昧不觀攝見順有離覺
毛端族舉佛刹掌上斷置世界不覩非咎應度方知得其
門者寡故道俗之煩而息化城指盡謂窮性海而已

上有
闕文

焉足知恆沙德用法界真有哉春秋五十二凡三十二夏
以大唐開元二十七年五月二十三日入般涅槃於薦福
僧坊門人明空等建塔於長安城南畢原人天會葬涕泗
如雨禪師之不可得法如此其世行遺教如一切賢聖維
十年座下俯伏受教欲以毫末度量虛空無有是處誌其
舍利所在而已銘曰

嗚呼人天尊全身舍利在畢原

六祖能禪師碑銘

無有可捨是達有源無空可住是知空本離寂非動乘化
用常在百法而無得周萬物而不殆鼓枻海師不知菩提
之行散花天女能變聲聞之身則知法本不生因心起見
見無可取法則常如世之至人有證於此得無漏不盡漏
度有爲非無爲者其惟我曹溪禪師乎禪師俗姓盧氏某
郡某縣人也名是虛假不生族姓之家法無中邊不居華
夏之地善習表於兒戲利根發於童心不私其身臭味於

耕桑之侶苟適其道羶行於蠻貊之鄉年若干事黃梅忍
大師願竭其力卽安於井臼素剗其心獲悟於穉穉每大
師登座學眾盈庭中有三乘之根共聽一音之法禪師默
然受教曾不起予退省其私迴超無我其有猶懷渴鹿之
想尚求飛鳥之跡香飯未消弊衣仍覆皆曰升堂入室測
海窺天謂得黃帝之珠堪受法王之印大師心知獨得謙
而不鳴天何言哉聖與仁豈敢子曰賜也吾與汝弗如臨
終遂密授以祖師袈裟而謂之曰物忌獨賢人惡出已吾
且死矣汝其行乎禪師遂懷寶迷邦銷聲異域眾生爲淨

土雜居止於編人世是度門混農商於勞侶如此積十六載南海有印宗法師講涅槃經禪師聽於座下因問大義質以真乘旣不能酬翻從請益乃歎曰化身菩薩在此色身肉眼凡夫願開慧眼遂領其一作徒屬盡詣禪居奉爲

挂衣親自削髮於是大興法雨普灑客塵乃教人以忍曰忍者無生方得無我始成於初發心以爲教首至於定無所入慧無所依大身過於十方本覺超於三世根塵不滅非色滅空行願無成卽凡成聖舉足下足長在道場是心是情同歸性海商人告倦自息化城窮子無疑直開寶藏

其有不植德本難入頓門妄繫空花之狂曾非慧日之咎
常歎曰七寶布施等恆河沙億劫修行盡大地墨不如無
爲之運無礙之慈宏濟四生大庇三有旣而道德遍覆名
聲普聞泉館卉服之人去聖歷劫塗身穿耳之國航海窮
年皆願拭目於龍象之姿忘身於鯨鯢之口駢立於戶外
跌坐於牀前林是梅檀更無雜樹花惟薝蔔不嗅餘香皆
以實歸多離妄執九重延想萬里馳誠思布髮以奉迎願
叉手而作禮則天太后孝和皇帝並敕書勸諭徵赴京城
禪師子牟之心敢忘鳳闕遠公之足不過虎溪固以此辭

竟不奉詔遂送百衲袈裟及錢帛等供養天王厚禮獻玉衣於幻人女后宿因施金錢於化佛尚德貴物異代同符至某載月日忽謂門人曰吾將行矣俄而異香滿室白虹屬地飯食訖而敷坐沐浴畢而更衣彈指不留水流燈焰金身永謝薪盡火滅山崩川竭鳥哭猿啼諸人唱言人無眼目列郡慟哭世且空虛某月日遷神於曹溪安座於某所擇吉祥之地不待青鳥變功德之林皆成白鶴嗚呼大師至性淳一天姿貞素百福成相眾妙會心經行宴息皆在正受譚笑語言曾無戲論故能五天重跡百越稽首修

蛇雄虺毒螫之氣銷跳及彎弓猜悍之風變畋漁悉罷蠱
酖知非多絕羶腥效桑門之食悉棄罟網襲稻田之衣永
惟浮圖之法實助皇王之化弟子曰神會遇師於晚景聞
道於中年廣量出於凡心利智踰於宿學雖末後供樂最
上乘先師所明有類獻珠之願一作顧世人未識猶多抱玉
之悲謂余知道以頌見託偈曰

五蘊本空六塵非有眾生倒計不知正受蓮花承足楊枝
生肘苟離身心孰爲休咎其一至人達觀與佛齊功無心捨
有何處依空不著界徒勞八風以茲利智遂與宗通其二

愍彼偏方不聞正法俯同惡類將興善業教忍斷嗔修慈

捨獵世界一花祖宗六葉

其三

大開寶藏明示衣珠本源常

在妄轍遂殊過動不動離俱不俱吾道如是道豈在吾

其四

道遍四生常依六趣有漏聖智無義章句六十二種一百

八喻悉無所得應如是住

其五

大唐大安國寺故大德淨覺師塔銘

光宅眞空心王之四履建功無旱法將之萬勝故大塊羣

籟無弦出法化之聲恆沙眾形

闕二字

爲寶嚴之色至如六

師兆亂四諦徂征開甘露狹小之門出臭烟朽故之宅踞

寶牀而搖白拂徐誘草菴沃金瓶而繫素繒遂登蓮座足
使天口雄辯刮語燒書河目大儒培仁擊義斯爲究竟孰
不歸依禪師法名淨覺俗姓韋氏孝和皇帝庶人之弟也
中宗之時後宮用事女謁寢盛主柄潛移戚里之親同分
珪組屬籍之外亦綰銀黃況乎天倫將議封拜促上方令
鑄印命尚書使備策詰朝而五土開國信宿而駟馬朝天
禪師歎曰昔我大師尚以菩提釋位今我小子欲以恩澤
爲侯仁遠乎哉行之卽是裂裳裹足以宵遁乞食餬口以
兼行入太行山削髮受具尋某禪師故蘭若居焉猛虎舐

足毒蛇熏體山神獻果天女散花澹爾宴安曾無喜懼先
有涸泉枯柏至是布葉跳波東魏神泉應焚香而忽湧北
天眾果候飛錫而還生禪枝必復之徵法水再興之象聞
東京有頤大師乃脫履戶前摳衣座下天資義性半字敵
於多聞宿植聖胎一瞬超於累劫九次第定乘風雲而不
留三解脫門揭日月而常照雪山童子不顧芭蕉之身雲
地比邱欲成甘蔗之種大師委運遂廣化緣海澄而龍額
珠明雷震而象牙花發外家公主長跪獻衣薦紳先生却
行擁篲乞言於無說請益於又損天池杯水遍含秋月之

輝草葉樹根皆霑宿雨之潤不窺世典門人與宣父中分
不受人爵廩食與封君相比至於律儀細行周密護持經
典淡宗毫釐剖析窮其二翼卽入佛乘趣得一毛亦成僧
寶於是同凡現疾處順將終忽謂衆人有疑皆問我於是
夜當入無餘開口萬言音和水鳥踴身七樹光映天人如
顰出行泯然跌坐以某載月日歸大寂滅某月日遷神於
少陵原赤谷蘭若香油細氈用以茶毗合璧連珠爲之葬
具城門至於谷口幡蓋相連法侶之與都人編素相半叩
膺拔髮灑水盆塵升堂入室之徒數踰七十破山澍海之

哭聲振三千則有僧某乙尼某乙故惠莊某氏某郡主賢者某乙等各在眾中共爲上首或行如白雪或名亞紅蓮或爲勝鬘夫人或稱毗邪居士二空法外何處進求七覺分中誰當決釋猶衣舍利冀獲菩提身塔不出虎溪淚碑有同羊峴表心成相相非離於真如敘德以言言豈著於文字乃爲銘曰

小三千界後五百年空乘玉牒莫覩金仙無量義處如來之禪皆同目論誰契心傳其一弟在人間姊歸鳳闕去日留訓別時翦髮累賜金錢將加印紱忽爾宵遁終然兩絕其二

救頭學道裏足尋師一花寶樹八水香池戒生忍草定長

禪枝不疑少父更似嬰兒

其三

既立勝幡併摧邪網利眼金

翅圓身寶掌巧撮死龍能調老象魔種敗壞聖胎長養

其四

四生滅度五陰虛空無說無意非異非同此身何處彼岸

成功當觀水月莫怨松風

其五

大唐吳興郡別駕前荊州大都督府長史山南東

道採訪使京兆尹韓公墓誌銘

嗚呼謂天未喪斯文宣尼去魯而無祿謂天果輔有德樂
毅去燕而不歸夫子處順而終穆伯猶毀以請飾棺置境

返葬於周公諱朝宗字某本出昌黎今爲京兆人也其先
或元袞赤烏介圭覲王朱纓綠滕執訊擒敵周末諸侯相
王始啟宣陽漢初功臣定封亦荒岱郡曾祖諱倫左衛率
賜爵長山縣男祖某隱居不仕父諱思復御史大夫太子
賓客進封長山縣伯遯世者名高善卷黔婁事君者位至
倪寬卜式公卽長山府君之長子也神言有公侯之徵兒
戲陳俎豆之法學成孫叔狀類皋繇年若干應文以經國
舉甲科試右拾遺天祿校文獻子雲之賦馬生驟諫稱公
高之官拜監察御史兵部員外郎埋輪憲府奏記劾大將

軍賜筆禮闈董戎從小司馬轉度支郎中除給事中度錢穀之盈虛以均九賦執制詔之可否以辨五書置王令於水源豐國財於天府尋知吏部選事興廢繼絕不過前人之光選賢授能必當庶尹之任旌平淑慝御以清通除許州刺史荊州大都督府長史山南採訪使坐南陽令貶洪州都督遷蒲州刺史所履之官政皆尤異黜陟使奏課第一徵爲京兆尹外家公主敢縱蒼頭廬兒黠吏惡少自擒赭衣偷長恥用鈞距得情好以春秋輔義奏事盡成律令爲吏飾以文儒上悅其醇方委以政頃坐營谷口別業貶

高平太守又坐長安令有罪貶吳興郡別駕諸葛田園未
啟明主華陰傾巧卒敗名儒天寶九載六月二十一日寢
疾薨於官舍享年六十有五暨國家推五運之紀接千歲
之統開釋天地與之更始宥萬方之未昭蘇敘百官之喪
職秩苟有位者咸得與焉而公冥然不及見也虛蒙大賚
重以爲哀夫人河東柳氏父某某官言妃齊侯實惟宋子
人傳夫人之禮家有大家之書以開元五年六月五日先
公而卒至是以天寶十載十月二十四日合祔陪於藍田
白鹿原長山公先塋禮也長子曰某官居憂而卒次子某

前殿中侍御史貶晉陵郡司戶次子某等倚廬野次方銜
枕凶之哀輿櫬歸來尚抱長沙之痛公子之輸力王室公
之紀勲太常言於國竭情無私理於家陳信無愧降年不
永非命而何誌則有由或題季子之墓宅不改卜素有滕
公之銘銘曰

帝周發之苗裔兮受介圭以建侯中裂土以分晉兮又王

韓以

關二
字

紛吾既有此內美兮

關一
字

忠信以爲乘登麒麟

兮判白虎冠獬豸兮奮蒼鷹朝含香兮禮闈夕青瑣兮黃
扉方天公兮密啟建出牧兮高麾俄入守兮京兆賜黃金

兮披皁衣捐余佩兮江中隱思君兮不可窮歌泰山兮不
返夢濟洹兮遂空素車兮逶遲苑鄉關兮故時望國門兮
不入到泰山兮不知瞻舊域兮松楸平原夕兮素漣愁魂
兮歸來江南不可以久留

故任城縣尉裴府君墓誌銘

天寶二年正月十二日唐故魯郡任城縣尉河東裴府君
卒於西京新昌坊私第享年三十九嗚呼哀哉君諱回字
玉溫河東聞喜人也曾祖宏泰皇雍州錄事參軍贈上黨
長史祖思義皇侍御史吏部員外左司郎中戶部吏部侍

郎河東郡太守晉城縣開國子父歆珍皇薛王府騎曹參
軍自晉已降世爲冠族令德不替以至於君夫其事親孝
兄弟順與朋友信其從政公平而壽不中年官才一命慈
母在堂諸弟未仕兒未有識女且嬰孩妻天於前身歿於
後天可問邪其若老親何其若季仲諸孤何生人之悲莫
甚於是家貧祭以棗脯殮以時服以某月日祔葬於鳳樓
原先府君之塋嗚呼有河東裴子之墓誌之蓋古有之繼
後之知者亦何有哉銘曰

一死萬紀終天不復爲之奈何哀哀慟哭覆載至廣庶類

繁育萬物方春而就於木

工部楊尚書夫人贈太原郡夫人京兆王氏墓誌

銘

夫人諱某京兆霸城人也晉出三家公子尊於魏國秦亡
六國時人謂之王家河南則分虎臨人華陰則老熊當道
高祖德真皇左僕射祖九思京兆府三原縣令父潛河南
府告成縣令大名之後重光不替夫人令儀淑德發於天
姿閑禮明詩傳於世業言成女誠可著於縑緗行爲女師
詎資於麻枲豈止彈琴吐論誦賦吟詩而已及乎有行嬪

於君子事姑至孝旁穆六姻爲母淡慈均養七子男以無
雙令德降帝子於鳳樓女則第一解空歸法王之象教閨
門之訓朝野稱多旣而家列公侯地連妃主珠翠滿座不
御采衣方丈盈前惟甘素食同德大師大照和尚覩如來
之奧昭羣有之源夫人一入空門便蒙法印朱簾紺憶無
復餘乘龍藏寶經悉通至義惠用圓滿誠力堅嚴藥藉茹
葷雖愈疾而不受心已久淨縱沒齒而常安以某年月日
奄歸大寂於長興里之私第厥初寢疾彌曠旬時駙馬上
人柴毀骨立揮淚嘗藥身不解衣泣血持經手不釋卷晝

夜懺悔非止六時身命供養寧唯七寶御醫繼踵中使重
跡魂兮不反空焚外國之香生也有涯非無上天之樂某
月日有詔追贈太原郡夫人襄城石窰增寵其榮名翟第
魚軒空悲於象設以某月日安厝於某原禮也功德之至
散花天女不留釋梵之筵勝鬘夫人何在嗚呼哀哉乃爲
銘曰

天生淑德實俾宜家特能柔順淡棄驕奢詎離環佩不御

其華

其一

婦道允諧母儀具美每出誠夫停餐訓子賦掩西

征書教內史

其二

門容高憶庭列長筵男乘翠鳳女比紅蓮

繁華貴里寂寞安禪

其三
下闕

唐故潞州刺史王府君夫人榮國夫人墓誌銘

夫人姓盧氏范陽人也昔堯命伯夷典秩宗號太常爲尚

父疑桓襄之際公子食盧卯金故人王於大國越石從事

官至郎中曾祖士會

世系表
作士繪

隋行臺侍御史祖某皇朝奉

禮郎父某濠淄卽等三州刺史持斧衣繡威加不法奠玉

瘞帛舉無違禮守臨淄而齊兒不詐去臨卽而蜀物盡留

夫人卽府君之長女積累世之德鍾二門之美儀表秀整

進止詳閒不咨保傳動由詩禮旣以士

一作七

族冠時遂歸

齊大之偶入持門戶內事舅姑枕席溫清於堂上環珮逶迤於堂下不脫簪珥親當澣濯元纁可實於筐篚棗盛可獻於宗廟魚軒或駕翟茀而朝眾婦於是修容夫人專之以禮克贊君子累至大官雅政清德實多左右潞州早世淡秉義方母儀可則庭訓不替女史之學多讚大家之書眾婦之儀盡稟夫人之法天與盛德不降永年以某月日寢疾薨於長安善和里享年若干以某月日合祔某山原禮也子某某官淳孝之性泣血待盡永惟令德固不可泯彰示後人乃刊於石銘曰

有姜之後或邑於盧歷代種德示有稱孤從事文府振轡

長途

其一

憲府持法奉常秉禮皇考專城腰章郡邸厚德重

跡重仁繼體

其二

降生哲人其行惟惇儀型眾庶門冠諸姻

齊姜宋子敢望清塵

其三

君子之貳實聞高義乃躬澣濯先

晨簪珥穆及外親敬是中饋

其四

母儀旣峻庭訓載揚子以

才貴煌煌寵章馳暉難駐令聞空長

其五

壽宮旣啟高堂永

寂千秋萬古山川松柏紀德誌行維茲貞石

其六

汧陽郡太守王公夫人安喜縣君成氏墓誌銘

夫人字某某郡人也其先周成王之後古之錫姓命氏或

以先父之職官或因始祖之名謚漢魏以降史牒詳焉曾祖休寧某官祖某某官襲封常山公貳公執帛調護儲闈九伯剖符典司方岳父某某官漢雄右輔實拜翁歸周命僕臣惟茲伯罔夫人卽太僕府君之第二女也世有明訓家無遺德蕙心紉質豈曰師成螭首蛾眉抑惟天與同雲降雪常聞柳絮之詩獻歲發春卽賦椒花之頌言事姑舅宜其家室寢門纔闢笄六珈而問安擊鐘未晞具八簋而獻饋染朱與綠不愆公子之夜采藻及蘋有甚季姜之祭魚軒翟茀爲諸侯之夫人鳴珮垂環對有國之君子綺疏

寓目助選賢人青帳藩身用酬高論善持門戶能睦族姻
誠良人之從畋不嘗原獸訓愛子之爲政遂返池魚言成
大家之書行爲眾婦之法至於彈琴製賦纂組攻書具舉
百事之能仍居四德之外嗚呼降年不永春秋五十以某
載月日薨於長安平康里之私第某月日祔於咸陽洪瀆
原之先塋禮也不獲偕老空傷奉倩之神未始有生誰達
莊周之理長子濡前某官次子澄某官次曰某某官及女
等漣漣泣血煢煢在疚哀纏聖善痛七子之無依文敘塞
淵冀九原之可識乃爲銘曰

齊侯之子兮衛侯之妻膚如凝脂兮手如柔荑奉初之嘉
訓兮淑德日躋供養兮姑舅簪珥問安兮先夜漏製三纁
兮元纁具五獻兮籩豆翟茀兮錦衣駕魚軒兮來歸從如
雲兮滿中闈忽形沈兮影絕夫傷神兮子泣血悲餘澤兮
猶在怨迴文兮未滅返葬兮咸陽寒天暮兮渭水長嗟梧
桐兮半死無雙飛兮鳳凰

爲崔常侍祭牙門姜將軍文

維大唐開元二十五年歲次丁丑十一月辛未朔四日甲
戌左散騎常侍河西節度副大使攝御史中丞崔公致祭

於故姜公之靈嗚呼天子命我建旗西門帶甲十萬鐵騎
雲屯橫挑強胡飲馬河源嗟爾勇健表爲牙門牙門伊何
全齊大族四方有事誓死鳴轂前有血刃後有飛鏃其氣
益振大呼馳逐翩翩白馬象弧雕服戈舂其喉矢注其目
嗚呼天下無事今上好文爾有餘勇莫敢邀勲腰鞬白首
蹉跎塞雲死於裨將誰統前軍家本秦人靈車東驚長天
積雪邊城欲暮麾下行哭前旌抗路身有寶劍不佩而去
轅有代馬悲鳴踟顧嗚呼我誠軍吏令送爾歸旣素我服
亦朱其衣黥虜未滅壯士長辭牢禮以祭太息獻欬尚饗

爲羽林軍祭武大將軍文

維年月日將軍某等謹以清酌少牢之奠祭於故大將軍
武公之靈嗚呼武公命代出羣氣蓋朔方勇冠六軍生長
下國聲聞上天天子壯之命居北門北門伊何國之重寄
羽林孤兒旄頭突騎罔不畢勸爲之元帥帝在紫微與君
爲衛身恆披堅手不捨銳出乘天駟入並東第同官爲寮
出入五世顧我軍旅凜然遺風一日之長萬夫之雄身雖
有極德不可窮嗚呼門館蒼黃風景淒涼櫪馬悲鳴角弓
不張弔客接武哭聲滿堂嗚呼凡人有喪匍匐斯救況我

武公屨及其雷盟而撫之含玉當受敢不嗣事如公之舊

爲人祭李舍人文

年月日某以茶藥之奠祭於故舍人李公之靈嗚呼見人多矣未有如子生於德門長於貴里名高江夏之童貌奪河陽之美行比顏曾才兼文史含恣輕肥抑偃紆綺惡如涕唾棄如塵滓比布衣以同年甘蔬食而沒齒嗚呼淡入度門高居道源獨一靜處寂默無言待草誡之眞性歸化光之法尊曠無淨染頓離塵根豈期昨日分首別離未久萬法皆空一生何有無餘涅槃應無所受無漏智慧斯爲

不朽予以凡情哀哀其後世相謂然道心斯醜敢不從俗
子其無咎

爲兵部祭庫部王郎中文

惟公宏量碩德抱義戴仁早離戎見常守吾真朝稱端士
世謂淳人夏官之職惟賢是寄旣節五官兼選騎士宿衛
扞城必由茲地速應爲敏平分是貴決遣先馳曹無留事
嗚呼積善無慶寢疾彌留唐肆求馬夜壑藏舟溪悟幻境
獨與道遊死而不念魂兮若休嗚呼某等何幸得備官屬
泰然若春溫兮如玉去德何永事生何促五情如喪百身

金定台曆卷之二十一
不贖敬獻醴牢哀哀慟哭尚饗

爲人祭某官文

惟公宏量碩德寡言敏行直而能婉和而不競闕儒墨爲
鋒鏑在顏冉之季孟白雲刑官繡衣使者時無冤人路多
避馬旣踐文昌來司武庫冀翟車之高足爲鳳池之先路
豈期位薄德崇才遠途窮拜命之時初一朝於北闕移疾
於外不再入於南宮嗚呼哀輓悲笳寒天疎木宅不卜地
祔於故塋家無餘財歛以時服弟難會葬兒未及哭其營
護而奠遣惟甥姪與姻族某嘗同官實喜良友仰德彌高

立言不朽居常接膝未忍分手況永訣兮無期向空筵而
釀酒尚饗

爲人祭兵部房郎中文

維載月日朔某官某乙謹以酒脯之奠敬祭於故兵部郎
中房公之靈嗚呼君子之才周而不器苟求行道未嘗私
身沈靜好謀話言必推往歲穀貴關輔阻饑眷命自天發
廩以賑中朝乏使屬之鄙夫不敢自賢請子爲介匹夫婺
婦黃口之孤鍾釜之施罔不畢當舉無棄粒野有頌聲國
家厭兵革苦徵戍大去浮食以靖國人單車諭旨萬里窮

磧西度赤坂館於烏孫形勞者病神勞則天棄成功於末
路未復命而言謝死不廢命忠也尸而加紳寵也我盟而
撫子瞑受含求仁得仁其誰不死玉關之下素車倭遲愁
雲晝聚白雪春下絳旄從風車徒行哭至上京而不駐將
返葬於關東河活活而東注天慘慘而悲風道路猶長子
實途窮人世如舊子實成空我有旨酒以歆以饒想像明
德獻歎出涕尚饗

爲楊郎中祭李員外文

維載月日朔行尚書司勳郎中賜緋魚袋楊元璋等謹以

清酌少牢之奠敬祭於故左司員外郎李公之靈嗚呼大
樸難名大辯若訥泊兮無兆汎然隨物直而好學敏以從
事行隱於寡言文成於沈醉澡身浴德惟仁與義讀書甚
解作賦彌工麗詞秀務疑奧義元通記言西掖起草南宮
第五將姪伏波事嫂食先與甘衣必讓好口嘗其糲身席
於藁結友一言同官一日殉我朋友忘其身恤豈惟攜手
亦將加膝明明天子惟賢是思恨馮唐之已老喜相如之
同時罷刊書於虎觀將載筆於鳳池嗚呼病時七啟卧內
一訣痛乾坤而忽窮嗟古今而長絕永言北首返葬東周

何夫子之適去同眾人之若休歷千門而行哭動九陌而增愁馬悲鳴而笳咽雲寡色而風秋元璋等或結髮舊遊比肩同列悲讙歌之首路哀柳車之就轍嗟無見而空來痛不知而成列嗚呼哀哉尚饗

爲王常侍祭沙陀鄴國夫人文

維年月日朔河西節度使左散騎常侍王公遣總管石抱玉以酒牢之奠致祭於故沙陀鄴國夫人之靈嗚呼惟此淑德降於異域至性不師天姿靡飾禮容詎假於環珮工藝非因於組織行閨訓於穹廬成母儀於蕃國懿此清範

夫人之則沙陲令門外家之力嗚呼夫人歸命干戈遂寢
子孫扞城國家高枕居之右地革其左衽散辮垂鬟解裘
衣錦嗚呼降年不永遠日方臨寂矣高堂飲珠含玉哀哉
貴女刃面摧心嗚呼聖朝命我護此諸蕃夫人所出天子
加恩能守漢制不效夷言馬無北首車必南轅教義所及
忠信彌敦實嘉內訓用潔斯樽尚饗

欽定全唐文卷三百二十八目錄

崔翹

上元宗尊號表

請封西嶽紀榮號表

請封西嶽表

對家僮視天判

對伏日出何典憲判

對縣令不修橋判

對祭婦判

張嵩

雲中古城賦

胡皓

舊州都督贈幽州都督吏部尚書諡文獻姚府君

碑銘

并序

鄭繇

水鏡賦

王邱

授崔翹中書舍人制

授裴敦復中書舍人制

田休光

法藏禪師塔銘

并序

欽定全唐文卷三百二十八

崔翹

翹清河武城人官禮部尚書東都留守

上元宗尊號表

臣聞上元成命錫禎符以應期聖皇乘時受神策於興運
是以啟殊祥於景福崇大號於至公伏惟陛下纘重元之
耿光嗣五聖之丕緒大德侔於天地至化貫於陰陽感元
道之尊運百辟之議三冒闕下累陳鴻名陛下猶以固讓
爲心不以至公爲意臣等請以符瑞重敘明之日者五星

欽定全唐文

卷三百二十八

崔翹

一

如連珠兩曜如合璧卿雲蔚膏露凝天之貺也瑤英產於
金阨元記開於玉洞神光見真誥傳地之祥也固知天地
以鴻休報陛下陛下以至德通乾元允宐合符克配徽號
伏奉乙卯詔書曰志存要妙理却虛名臣又聞之天不讓
高地不辭大五帝法之而成象三王參之而比德先天地
者道也聖祖已著於強名合天地者聖也陛下允膺於明
稱式彰妙用豈曰虛名況禎祥感通旣著於彼靈應參會
又符於此是以封章再獻而雲日重光徽號三陳而烟霄
降澤天人交感影響必臻若然者陛下安得闕三才之大

端抑萬姓之勤願違祖宗之睠命曠天地之符文臣等固陋猶知不可況真宗示慶祕簡呈文乘王氣於玉行擁神休於寶運伏願光臨大寶允答洪休嘗垂覆載之仁永保延長之厯天下幸甚

請封西嶽紀榮號表

自今辛亥至於癸丑累表誠祈請紀榮號聖心恭默冲讓再三臣等伏讀綸言退增祗慄敢重瀝愚懇期諸必遂臣聞聖人之言與春秋而同信上天之宰將影響而合符昭報不可以久稽成命不可以固拒今靈山警蹕望玉鑾之

升中儒林展儀思金匱之盛禮發祥儲祉喻以封山入事
天時不可失也伏惟開元天地大寶聖文神武應道皇帝
陛下祖武宗文重熙累洽霑風化而砥礪在動植而昭蘇
外戶不扃餘糧栖畝其神功至道廣瑞殊祥前表縷陳安
敢浮說夫修德以俟命勒功以告成將欲竭款神祇雍熙
帝載未爲過越也伏惟覽公卿之儀考封禪之禮陟華蓋
於翠微轉鈎陳於雲路泥金於菡萏之上刻玉於明星之
前使三五六經復再聞於唐典七十二姓不獨紀於夷吾
敷景福以浸黎元錫大慶而後天地蒼生之望也朝廷之

幸也無任誠懇惓款之至謹詣朝堂奉表陳請以聞

請封西嶽表

臣翹等伏稽古訓上請增封再奉明旨未蒙允諾臣等承
詔惶駭失圖臣聞省方展義君人之大典登封告成王者
之不業是以古先哲后道洽則封所以答神祇之功增兆
庶之福無私於已故行之者不思必順於天故言之者難
奪敢昧萬責竭誠終請伏惟開元天地大寶聖文神武應
道皇帝陛下紹文武之不烈合君臣於昌運均雨露和陰
陽四海無波而靜默羣生自樂而仁壽繇是德懷蠻貊澤

洎昆蟲宗廟祀典罔不祇肅要荒殊俗亦莫不庭自皇王
已來載籍所記未有混區宇窮貞祥地平天成德茂道洽
若今日之盛者與固可告太平之功展封崇之禮故臣與
王公侯伯黎老縉黃累陳白奏備竭丹懇豈謂聖恩猶阻
皇鑒未迴伏奉癸丑詔書曰輕修大典所不願爲臣等戰
慄匪遑寧處實以陛下功成道洽理實升中且夫龜龍咸
格天意也夷夏大同人事也時和年豐太平也無爲清淨
至理也允應大典豈謂輕修乎奉若靈命安可不爲乎臣
等敢冒宸極重明其義竊以西嶽華山實鎮京國皇虞之

所循省靈仙之所依憑固可封也況金方正位合陛下本命之符白帝臨壇告陛下長生之籙發祥作聖抑有明徵又可封也昔周成王以翦桐爲戲唐叔因是而定封蓋人君之言動有成憲斯事至細猶不忽也況陛下眷言封祀宿著神明道已洽於昇平事未符於琬爰豈可抑至公於私讓棄誠信於神明乎固不可得而辭也日者封章累奉嘉應必臻一獻而甘雨流再陳而瑞雪降則知人天之意影響合符若然者陛下安得稽天命以固辭違人事以久讓太平不告其若休祥何至理不答其若神祇何伏願仰

答天心允祇靈貺上以揚祖宗之盛烈下以副億兆之懇誠克崇上報永光大典臣等幸甚

對家僮視天判

甲於庭中作小樓令家僮更直於上視天乙告
違法甲云專心候業不伏

易不云乎仰觀時變詩有之矣上列昭回國家蓋轉銅渾
灰飛玉律曙光侵而鼓應暝色下而鐘鳴月穆穆而增波
烟藂藂而不散苟非其局必寘刑名甲今家僮心謀窺管
至如長雲氣色京房有隱士之占德星夜聚太史有賢人

之奏儻泛言古事自合張裕之流如私習天文請寘呂刑之訓必也業傳弓冶名隸保章寧失不經豈濫無罪待窮由緒方正科條

對伏日出何典憲判

廣漢等四郡俗並不以庚日爲伏或問其故云地氣溫暑草木早生異於中土常自擇伏日旣乖恆經出何典憲

廣漢之郡實惟沃壤江波濯錦斜分白馬之津山嶂吐雲近對黃牛之峽皇明撫運文軌大同自北徂南東被西漸

徒以窪盈異等風候殊宜草木偏早於陽春金火不取於
今日炎蒸郁輒未見行車毒霧氛氲唯看墜鳥論其恆式
違帝者之金科語以憲章符漢王之故事是非之理其在
茲乎

對縣令不修橋判

長安萬年縣坐去歲霖雨不修城內橋被推按
訴云各有司存不伏科罪

顧兔離星商羊應雨浸厚地而沮洳灑長天而蕭索凝雲
不動履雙闕而朝躋行潦坐流匝四溟而夜下遂使鵲橋

牢落虹影歛傾石杠沈而鐵鎖暗移舊枝壞而新查亂墜
兩城之內是曰帝居作曹自合修營赤縣元非管屬輒被
推按乃涉濫刑至於司存事資懲罰牒問由緒方正科條

對祭器判

少府監申稱太常寺牒稱須造罇罍彝器并舟
不詳形狀制度請裁下

先王制物禮器爲先商周虞夏形容各異象罇之儀爰刻
象以成形玉斚之名遂以玉而爲飾罍雲采采如開五色
之雲彝鳥軒軒似翥六時之鳥舟其足也夫復奚疑少府

自有常儀太常非無舊準更請裁下未爽公方至於規模
並在於此如愚管見謂叶通途

張嵩

嵩初舉進士常以邊任自許代郭虔瓘爲安西都護開元
十年轉太原尹

雲中古城賦

開元十有四年冬孟月張子出玉塞秉金鉞撫循邊心窺
按窮髮走汗漫之廣漠陟崢嶸之高關徒觀其風馬哀鳴
霜鴻苦聲塵昏白日雲繞丹旌虜障萬里戍沙四平乘蒙

恬之古築得拓跋之遺城伊昔晉人失政亡彼金鏡海水
朝飛櫓槍夕映鵝呈而二京繼覆馬渡而五胡交盛慨逐
鹿而爭雄空瞻烏而莫定於是魏祖發大號鼓洪爐天授
宏略神輸祕圖北清獫狁南振荆吳繇是一太陰以建極
則廣莫而論都遂徵板幹庀徒卒鏟嶢嶢削崛岉因方山
以列榭按長城以爲窟旣雲和而星繁亦邱連而岳突月
觀霞閣左社右鄧元沼泓沚湧其後白樓巖嶸興其前開
士子之詞館列先王之藉田靈臺山立璧水池圓雙闕萬
仞九衢四達羽旄林森堂殿轆轤當其士馬精彊都畿浩

穰始摧燕而滅夏終服宋而平梁故能出入百祀聯延七
主擊魯衛之諸侯廓秦齊之土宇禮興樂盛修文輝武講
六代之憲章布三陽之風雨亦云已矣哉俄而高祖受命
崇儒重才南巡主鼎之邑北去軒轅之臺鵬搏海運鳳舉
天迴嗤紇眞之鳥死憶新野之花開自朝河洛地空沙漠
代祀推移風雲蕭索溫室樹古瀛洲水涸城未哭而先崩
梁無歌而自落魏家美人聞姓元新聲巧妙今古傳昔日
流音遍華夏可憐埋骨委山樊城闕摧殘猶可惜荒郊處
處生荆棘寒飈動地胡馬嘶若個征夫不沾臆人生榮耀

當及時白髮須臾亂如絲君不見魏都行樂處只今空有
野風吹乃載歌曰雲中古城鬱嵯峨塞上行吟麥秀歌感
時傷古今如此報主懷恩奈老何

胡皓

皓開元三年朝請大夫祕書丞兼昭文館學士

嶺州都督贈幽州都督吏部尚書諡文獻姚府君

碑銘

并序

夫應順相成君臣有待豈不以參庸作輔

闕二字

移屯象闕

不可以不臨山川不可以不守於是開分都野對又天人

高爵命於儀刑大邕熙於品物五侯九伯公實當之公諱
懿字善意其先吳興郡大姓明考以宦歷陝圻遂留家於
硤石也昔有虞惟舜其姓惟姚欽若神明蓋云祖始子孫
蕃邈而迨於茲曾祖宣業陳

世系表
作梁

征東將軍吳興郡公

祖安仁隋青汾二州刺史遠圖膺錫大石垂休父祥隋懷
州長史檢校函谷關都尉煬帝誥以武能守於天險高門
晉燭何象賢之紛光哉公都尉之季子毅烈昭融蓄大容
遠藝工非習學遠無師燕雀

闕一
字

知鴻鵠自若以待奮也

年十八屬亂隋無象羣盜生郊授公本縣令以先人部曲

少用輯寧太宗濟河聞公名密遣相聞公告於州將曰王
充非主天命在唐宜速舉眾以應義不爾恐貽後感因間
道入謁高祖嘉歎者久之乃降賜墨書金帛以此闔州離
患太宗東伐王充授鷹揚郎將長沙縣男水陸道總管洎
賊平將舉籍議功有妄譖者云公會通僞鄭因見疑黜又
以明略用多每爲朋儕所忌乃築室於硤石東北重岡之
曲將以道德幽棲高尚其事右二陝左二陵北河南陰南
山北趾中養浩氣外衍遐風紫芝淹留赤松不返俄而貶
授晉州高陽府折衝都尉公抗疏自列謝病而退乃除常

州長史亦堅以疾辭尋除硤州刺史累加銀青光祿大夫
公舉六察按百城導齊江門茂育雲澤龍朔初邛蠻作梗
乃除公使持節舊州都督公正以馴吏嚴以蓄戎不罰而
徵不戰而服能以毀遠壽以衰遷啟全告終返真於始以
二年十二月一日終於官舍春秋七十有三嗚呼哀哉以
三年七月十五日藁葬於硤石縣安陽公之原未備遷禮
也公門傳孝義代蒙旌榜至若雞鶩家禽牛羊園畜互以
相乳不限所生豈非明德繼修應形殊類也公青雲誰與
白日相鄰武傑文英幽溪天理孝原忠極保合神庭餘力

所存致心無害雖五善三變窮妙曲成而藏器待時移官
於位乃作藩翰以制要荒綏之以誠不以言震之以威不
以暴遠夷文順羣物緝熙存立大功歿昭餘訓豈無明主
而有遐遺命矣哉公初娶張氏李氏並早歿後娶劉氏
累封彭城郡夫人則隋左常侍降之孫唐襄州長史志遠
之女今紫微令崇故宗正少卿元景之母也夫人於資福
祉實受靈和四德待行三從及嗣祇先導後在闔成家二
子少孤一門所恃長幼咸若禮訓所陶出有庶官入惟丞
相乃敷皇極遂廣人和至矣哉蓋由內則有方外成其大

而況乎眾姜羣婦罔或不宗於休夫人豈古之明達者矣
以神龍三年正月八日終於洛陽慈惠坊之私第嗚呼遺
令曰生以形累死以魂遊然事尊在冥無遠不至何必合
葬然後爲禮昔邴根矩沐德信並通儒達識咸以同窆爲
非實獲我心當從其議無改吾志爾惟孝乎歿已可於龍
門山外用爲窆窆冀近家園以慰吾平生之好耳崇等敬
遵遺旨以景龍二年歲次戊申九月庚寅朔十五日甲辰
葬於萬安山之南陽令公純德佐時高堂生感永思不待
長號罔極以爲東塋已異西兆未殷占考歲辰奏加封樹

以開元三年歲次乙卯十月己酉朔十三日辛酉庀徒有
作初景龍年以時宰先人特旨追贈幽州都督而神道貴
靜元宅不移重廣冥域因成象制天子於是乎昭寵大臣
追崇舊烈又制贈吏部尚書諡曰文獻公命五品官監護
賜米粟各二百石絹布四百端匹庶事官供特令優厚蓋
念功悼存發榮而資哀者也版築相麗賁飾其儀豐不近
奢薄不違儉名山大谷異勢盤紆密壙重墳靈祇式敘是
惟幽極可以永安揆德昭文長垂不已銘曰

氏原德先裔裔絲絲曷時無雋曷位無賢重象曜質紛紛

秩秩潔齊相亨休復於吉於時保之文獻非他我生則晬
天爵云多粵有符彩寧施琢磨英圖烈烈利用峨峨瞻天
厯象謁帝關河庸勛遠大錫命駢羅行行駟馬作藩荒遐
職職悟人爲範陶鈞政閒誰黷時修物育陟遐未窮歸冥
不復慈告式明卜宅離塋東畢西賁幽封大成尊尊孝子
昭發家聲

鄭繇

繇鄭州人嗣聖元年進士開元初爲岐王長史

水鏡賦

夫有名之域有象之中惟水能淨惟鏡能空水則無心而
皎澈鏡則照膽而幽通過物斯應匪我求蒙爾其決之則
流盈而不闕泛金碧而色潤開玉匣而光發其清也不煜
和風其鑒也不同意朗月爾乃雲收白日粉拭紅塵拂芰葉
而交映抱菱花而獨春直注千里旁通四鄰成美惡之元
鑒闕六字攬鬢興嗟濯纓爲足惜容輝之易晚歎功名之難
續況復影圓鳳沼聲激龍門可驚飛於神鵲可搖動於靈
鯤同大道之自然合重元之眾妙冰潭洞達石崖含耀亦
由裴楷清通王戎簡要知之類之疑意忘疲於屢照

金史卷之二十一
王邱

邱字仲山光祿卿同皎從子年十一擢童子科他童皆誦經而邱屬文由是知名及冠舉制科授奉禮郎開元中累拜黃門侍郎御史大夫改太子賓客襲父爵宿預男以疾徙禮部尚書天寶二載卒贈荊州大都督諡曰文

授崔翹中書舍人制

門下朝議大夫守給事中崔翹學行自中方直形外明而能晦簡不違謙始方蔚於文章終激揚於吏道駁議既久要密遞遷宜自珥貂之司俾參鳴鳳之掖可守中書舍人

散官如故

授裴敦復中書舍人制

敕朝議郎檢校吏部郎中裴敦復等並行標純一材蘊經
通或學辨文鼠核綜兼於隱蹟或詞握靈蛇光輝映於等
夷職居要劇聲振發揮近密之職搜擇宜精俾對掌於絲
言兼聯華於省闈可依前件

田休光

休光京兆人鄉貢進士

法藏禪師塔銘

并序

世之業生滅若輪環者則雖塵沙作數草木爲籌了無遺
纖哉吁不可知者其惟流浪乎夫木性生火水中有月以
凡筌聖從道場而至道場通因及果非前際而於後際行
之於彼得之於此禪師諱法藏緣氏諸葛蘇州吳縣人昔
羣雄角力三方鼎峙蜀光有龍吳恃其虎瑾之後裕蟬聯
姑蘇曾祖詵吳郡太守蘇州刺史祕書監銀青光祿大夫
上柱國開國男大父穎隨閬州刺史銀青光祿大夫父禮
皇唐少府監丞吳會旗裳東南旖旎洗墨而清夷落衣錦
而燭江鄉山海禁錢蓬萊祕府屢遊清貫歷拜寵章禪師

卽蘇州使君之曾孫少府監丞之第二子也年甫二六其
殆庶幾知微知章克岐克嶷此寺大德欽禪師廣世界津
航人非鑽仰禪師伏膺寂行禮備師資因誦經至永徽中
頗以妙年經業優長奉敕爲濮王度所謂天孫利益禪門
得人禪師自少出家卽與眾生作大善知識道行第一人
天殊勝開普門之幽鑰酌慈源之密波由恐日月居諸天
地消息每對天龍八部晝夜六時如救頭然曾未暫捨非
乞之食不以食以至於頭陀非掃之衣不以衣得之於蘭
若禪師自少於老駝騾象馬莫之聞乘也以爲鎔金爲象

非本也裂素抄經是末也欲使賤末貴本背僞歸真求諸如來取諸佛性三十二相八十種好眾生對面而不識奈何修假以望真且夫萬行之宗眾相之本生善之地修善之境禪師了了見之矣夫鐘鼓在庭聲出於外如意元年大聖天后聞禪師戒行精最奉制請於東都大福先寺檢校无盡藏長安年又奉制請檢校化度寺无盡藏其年又奉制請爲薦福寺大德非禪師戒固居龍象之首清淨閑人倫之目不然焉使天文屢降和眾相推揚覺路之威儀總禪庭之準的護珠圓朗智刃雄鳴伏違順之鬼魔碎身

心之株杌廢情屬境卑以自居如谷王之流謙百川委輸
若周公之吐哺天下歸心菩薩下人名存眾生之上悲哉
三界卽火宅之所四大將歲時之速旣從道來亦從道去
遂拂衣掩室脫舄繩牀惟惚惟恍不驚不怖粵以開元二
年十二月十九日捨生於寺報齡七十有八門人若喪考
妣乃相謂曰和上云亡吾徒安放乃救血相視仰天椎心
卽以其年十二月廿闕一字日施身於終南山楸梓谷屍陀
林由是積以香薪然諸花鬘收其舍利建塋睹波於禪師
塔右自佛般入涅槃於今千五百年矣聖人不見正法陵

夷卽有善華月法師樂見離車菩薩愍茲絕紐並演三階
其教未行咸遭弑戮有隨信行禪師與在世造舟爲梁大
開普敬認惡之宗將藥破病之說撰成數十餘卷名曰三
階集錄禪師靡不揆蹟索隱鈎深致遠守而勿失作禮奉
行是故弟子將恐頽其風聲乃掇諸景行記之於石銘曰
有若禪人凝棱心不易兮身世瀕洞揆討眞蹟兮寂行沖
融渙其冰釋兮軒裳蟬聯清暉相射兮奕襲不染乾乾衣
錫兮蕭灑諠譁地自虛僻兮元關洞開亾珠可索兮吾將
斯人免夫過隙兮魂兮何之聲流道格若使天地長久而

可知卽相與撫實刊之於石今